

Շապուհ Բագրատունու խօսքերն են Վարդանի մօտ (էջ 77) :

Այս կայսրը Լեւոն Հայկազն է (813-820) : Սրանից է ստացել հետեւագլխս Աշոտը կիւրացապաղատութեան պատիւը եւ առիթ ունեցանք արդէն յիշելու, որ երբ Ջահապ արաբ իշխանը զբաւեց Գուրնը, Աշոտ Մասկերի ժամանակ, Աշոտ Կիւրացապաղատը դիմեց Լեւոն կայսրին եւ խնդրեց օգնել նրան ազատելու Գուրնը : Բայց Լեւոնի վերահաս մահը Միքայէլի ձեռքով Աշոտի խնդիրը անկատար թողեց : Պէտք է կարծել, որ Աշոտ Կիւրացապաղատը իշխան ճանաչուեց արաբների կողմից Աշոտ Մասկերի հետ միաժամանակ : Կարճ միջոցում խորհուն գործունէութեամբ կարողացաւ «տիրել ի Կղարջաց մինչեւ ի Տփղիս լեռնակողմամբ հանգերձ» (Շապուհ առ Վարդան, էջ 78) :

Տարեգիրքը համաձայն է այս կէտում, երբ վկայում է որ Աշոտը նուաճեց Կղարջեթից մինչեւ Քասն գետը : Նուաճումը, ըստ Տարեգրքի, հետեւանք էր այն յաղթութեան, որ Աշոտը տարաւ Թիփլիսի արաբ ամիրայի վրայ :

Արդարեւ այդ ժամանակները Թիփլիսը գտնուում էր Մուհամմատ իրն Հատար արաբ ամիրայի ձեռքին : Հիւսիսից Աշոտ Կիւրացապաղատին հարեւան էր Ափխազաց թագաւորութիւնը : Ափխազները օգտուելով Բիւզանդիայի եւ իրազարների մրցութիւնից յաջողել էին արդէն հիմնել նոր իշխանական հարստութիւն եւ բաւականին ընդարձակել իրենց տէրութեան սահմանները, որոնց մէջ մտնում էին ոչ միայն բուն Ափխազիան, այլ եւ Մինգրելիան եւ Գուրիան գրեթէ ամբողջ ծովափեայ աղեղը :

Աշոտի կողմից պարզ հաշիւ էր բարեկամական յարաբերութիւն ստեղծել այս հարեւանի հետ, որ հակառակ դէպքում կարող էր ահաւոր լինել : Աշոտ Կիւրացապաղատը բարի համարեց Ափխազաց Թեւդաս թագաւորին փեսայացնել իր դստեր : Այս կերպ կարողացաւ իրեն զինակից անել Թեւդասին եւ միասին դէմ դնել Թիփլիսի ամիրային :

Տարեգիրքը հաւատացնում է, որ Կիւրացապաղատը քսան գետի մօտ ճակատեց ամիրային, որի օգնական էր Կախեթի իշխանը, եւ յաղթեց : Շուտով Աշոտի վրայ եկաւ Խալիլ Եղիզի որդին եւ Աշոտ փախաւ իր ընտանիքով

դէպի Յունաստան : Ջաւախքի լեռներում, Փարուան լճի ափին հանգստանում էր, երբ յարձակուեցին նրա վրայ արաբները, բայց Աշոտ յետ մղեց նրանց եւ գնաց Կղարջը եւ հաստատուեց Արտանուշ : Վերանորոգեց հին աւեր բերդը, շինեց Պետրոս եւ Պօղոս առաքելոց անունով մի եկեղեցի, ջանաց երկիրը շինցնել, աւերակները նորոգել, նոր գիւղեր շինել եւ խմբել բնակչութիւնը, որ տակաւին Մրուանի գործած աւերածութեան ծանր հետեւանքների տակ էր գտնուում : Քիչ յետոյ նենգութեամբ սպանուեց 826 թուին, Յունուարի 29-ին :

Այս պատմութեան մէջ ճշմարտութիւնն այն է, որ Աշոտ Կիւրացապաղատը Ջաւախքից հեռոճեաէ յառաջ է դնացել եւ հաստատուել Արտանուշում, եւ չի կարողացել շարժուել դէպի բուն Վրաստան, դիմադրութեան հանդիպելով Թիփլիսի ամիրայի եւ Կախեթի իշխանների կողմից : Խալիլ, որդի Եղիզի, սխալ ընթացումն է, փոխանակ Խալիլի (վրացերէն լ եւ ռ տառերը չփոխելի են), որ մեզ յայտնի Շայրանի իշխան է, կուսակալ Հայաստանի 827—832 տարիները : Որովհետեւ Աշոտ Կիւրացապաղատի մահը Տարեգիրքը դնում է 826 թուին, ուստի սխալ է գործում Խալիլ Շայրանի կուսակալին Աշոտի դէմ հանելով : Տարեգրքի օրինակներից մէկում չի յիշուում այստեղ Խալիլը յանուանէ : Հաւանական է որ եւ այս ընդհարումը նոյն Մուհամմատ իրն Ատարի հետ է եղած : Կամ պէտք է ընդունել, որ Աշոտի մահուան տարին սխալ է, ինչպէս Մարկուարտն է ընդունում, որ քիչ հաւանական է :

Խալիլը ընկճեց Թիփլիսի ամիրային եւ նրա տեղ նշանակեց Ալի՝ որդի Շուարի, ինչպէս վկայում են Տարեգիրքը եւ արաբ աղբիւրները : Ալի եղբայր էր Իսմայիլի որ Ատտարից յառաջ նոյն քաղաքի տէրն էր : Ալիից յետոյ յաջորդեց Իսմայիլի որդի Իսահակը :

Կիւրացապաղատի որդիները մանկահասակ էին երբ ինքը մեռաւ : Երէց որդին կոչուում էր Ատրնեբսեհ (վրացերէն Ազարնասէ), կրտսերը՝ Բագրատ : Իշխանութեան զլուխն անցաւ Բագրատ : Ինչ վիճակի մէջ էր Արտանուշի մահուակ իշխանութիւնը Կիւրացապաղատի որդիների անչափահասութեան ժամանակ, անորոշ է : Գիտենք, որ Խալիլ Շայրանի այնուհետեւ վե-